

Na osnovu člana 16. Zakona o Vladi Zeničko-dobojskog kantona-Prečišćen tekst («Službene novine Zeničko-dobojskog kantona», broj 7/10), na prijedlog Ministarstva za prostorno uređenje, saobraćaj i komunikacije i zaštitu okoline, Vlada Zeničko-dobojskog kantona, na 54. sjednici, održanoj 24.02.2012. godine, d o n o s i

ZAKLJUČAK

I

Utvrđuje se Prijedlog Zakona o izmjenama i dopuni Zakona o kantonalnim ministarstvima i drugim tijelima kantonalne uprave.

II

Prijedlog Zakona iz tačke I ovog Zaključka upućuje se u skupštinsku proceduru po skraćenom postupku.

III

Zaključak stupa na snagu danom donošenja.

Broj: 02-_____/12.

Datum, 24.02.2012. godine

Z e n i c a

PREMIJER

mr.sci.Fikret Plevljak dipl.ing.

DOSTAVLJENO:

1x Ministarstvo za prostorno uređenje,
promet i komunikacije i zaštitu okoline,

1x Stručna služba Skupštine,

1x a/a.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona, na ____ sjednici, održanoj __. __. 2012. godine, d o n o s i

ZAKON
o izmjenama i dopuni Zakona o kantonalnim
ministarstvima i drugim tijelima kantonalne uprave

Član 1.

U članu 10. iza stava 2. Zakona o kantonalnim ministarstvima i drugim tijelima kantonalne uprave – prečišćeni tekst („Službene novine Zeničko-dobojskog kantona“, broj:13/08 i 3/10, u daljem tekstu-Zakon), iza stava 2. dodaje se novi stav 3. koji glasi:

„U sastavu Ministarstva za prostorno uređenje, promet i komunikacije i zaštitu okoline Zeničko-dobojskog kantona nalazi se upravna organizacija „Kantonalni zavod za urbanizam i prostorno uređenje“.

Kantonalni zavod za urbanizam i prostorno uređenje obavlja stručne, upravne i druge poslove koji se odnose na:

- izradu planskih dokumenata za koje su nadležni Kanton i jedinice lokalne samouprave – općine u Kantonu (prostorne planove, urbanističke planove i detaljne planske dokumente),
- vrši određene stručne i druge poslove koji pretežno zahtijevaju primjenu stručnih i naučnih metoda rada i sa njima povezane upravne poslove koji se odnose na: planiranje prostornog i društveno-ekonomskog razvoja Kantona, izradu, čuvanje i stavljanje na javni uvid planskih dokumenata,
- davanje stručnih mišljenja i informacija u postupku izdavanja urbanističke saglasnosti iz nadležnosti Kantona u skladu sa zakonom,
- rad i razvoj geografsko-informacionog sistema Kantona, koji se odnosi na nadležnost Kantona u oblasti planiranja razvoja,
- vršenje drugih stručnih poslova utvrđenih zakonom i drugim propisima, odlukama Vlade Kantona i Skupštine Kantona“.

Član 2.

U članu 19. Zakona u stavu 1. tačka 3. i stavovi 6. i 7. se brišu.

Član 3.

Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: _____

Datum, _____

Z e n i c a

PREDSJEDAVAJUĆI

Miralem Galijašević

Obrazloženje

PRAVNI OSNOV

Pravni osnov za donošenje ovog Zakona sadržan je u odredbi člana 37. stav 1. tačka f) Ustava Zeničko-dobojskog kantona, kojim je utvrđeno da je Skupština Kantona nadležna za donošenje Zakona i drugih propisa za izvršavanje kantonalne nadležnosti.

RAZLOZI DONOŠENJA

U skladu sa članom 19. Zakona o kantonalnim ministarstvima i drugim tijelima kantonalne uprave – prečišćen tekst („*Službene novine Zeničko-dobojskog kantona*“, broj:13/08 i 3/10) Kantonalni zavod za urbanizam i prostorno uređenje ustanovljen je kao samostalna kantonalna organizacija koja se finansira dijelom iz Budžeta (plaće, topli obrok), a dijelom iz sredstava ostvarenih na tržištu (materijalni troškovi).

U cilju racionalnog organiziranja kvalitetne, sistematske i kontinuirane aktivnosti prostornog i urbanističkog planiranja za cijelo područje Kantona, te prvenstveno povjeravanje poslova izrade planskih dokumenata u Kantonu i općinama Kantona, Kantonalnom zavodu za urbanizam i prostorno uređenje, neophodno je pristupiti prvenstveno izmjeni Zakona o kantonalnim ministarstvima i drugim tijelima kantonalne uprave i Kantonalni zavod za urbanizam i prostorno uređenje organizovati kao upravnu organizaciju u sastavu Ministarstva za prostorno uređenje, promet i komunikacije i zaštitu okoline Zeničko-dobojskog kantona.

Ovakvom promjenom pravnog statusa Zavoda stvorile bi se pretpostavke da u narednom dugoročnom periodu Zavod obavlja poslove nosioca izrade, kako Prostornog plana Kantona, tako i svih prostornih, urbanističkih i detaljnih planova u svim općinama Kantona. Na ovaj način obezbijedili bi se ujednačenost i konzistentnost u procesu izrade planova, koristila bi se jedinstvena baza podataka, planovi bi bili međusobno kompatibilni, usaglašeni i lako uporedivi, a istovremeno bi se ostvarile značajne uštede u općinskim budžetima.

U tom slučaju bi se kroz zajedničko učešće sredstava iz kantonalnog i općinskog budžeta mogla finansirati izrada planskih dokumenata u Kantonu i općinama, a na osnovu godišnjih programa koje bi donosila Vlada Kantona u saradnji sa općinskim načelnicima.

Zbog navedenog predlažemo da se izvrši izmjena Zakona o kantonalnim ministarstva i drugim tijelima kantonalne uprave i Zavod organizuje u sastavu Ministarstva za prostorno uređenje, promet i komunikacije i zaštitu okoline Zeničko-dobojskog kantona, kao upravna organizacija koja će se u potpunosti finansirati iz Budžeta bez nužnosti za samofinansiranjem kroz učešće u tenderskim procedurama.

FINANSIJSKI EFEKTI

Za provođenje ovog Zakona, u prvoj fazi, potrebno je izvršiti korekciju prijedloga Budžeta Zeničko-dobojskog kantona za 2012.godinu, jer shodno istom na razdjelu 12, budžetska organizacija 01 potrošačka jedinica 0001 – Stručna služba Vlade, planiran je iznos od 348.000,00 KM na poziciji “Transfer za Kantonalni Zavod za urbanizam i prostorno uređenje”, pod ekonomskim kodom 614300.

Naime, predloženim izmjenama i dopunama ovog Zakona, mjenja se pravni status Zavoda, što znači da bi isti bio smješten u okviru Ministarstva za prostorno uređenje, promet i komunikacije i zaštitu okoline, kao posebna potrošačka jedinica, a što podrazumjeva planiranje na razdjelu 19.

Osim realokacije planiranih budžetskih sredstva za 2012.godinu, sa razdjela 12 na razdjel 19, potrebno je napraviti i prestrukturiranje rashoda po vrstama, te je potrebno angažovati i dodatna sredstva u minimalnom iznosu od 102.000,00 KM, a kako bi se pokrili prateći materijalni troškovi prema sadašnjem broju zaposlenih.

Međutim, za implementaciju Zakona u cijelosti, u narednim budžetskim godinama potrebno je obezbijediti dodatna sredstva kako bi se omogućio rad Zavoda u punom kapacitetu, odnosno da efikasno obavlja sve stručne poslove iz svoje nadležnosti.

DONOŠENJE ZAKONA PO SKRAĆENOM POSTUPKU

S obzirom da predložena izmjena nije obimna i složena, predlažemo da se shodno odredbama člana 140. Poslovnika Skupštine Zeničko-dobojskog kantona, Prijedlog Zakona pretrese po skraćenom postupku bez Nacrta Zakona.

Obradila

Nada Mišić

M I N I S T A R

mr.sci. Raif Seferović dipl.ing.